

藍園分壽詩

陶廬
題檢

壹卷

瘦雀

顧軒陳封翁暨德配黃淑人七齡雙慶

健青陳廣文語不佞曰。吾宗有顧軒封翁者。福人而兼壽人。丰土實惟善士。今之正月十有八日。爲翁七十覽揆之辰。喆嗣維藩維則維垣輩相與舞綵以懌之。酌斗以祈之。乞子一言。爲親雙壽。禮歟。不佞曰。敬諾。翁以計陶之學。爲羸頓之雄。潁水源長。太丘道廣。論者謂橋姚斥塞。平準起家。師史積居。陳椽得所。三徙成范少伯。千僮屬卓王孫。矧樂喜以厚。

施名。樊重以博濟著。達人本明德之後。餘慶由積善而來。築華信之錢塘。編王濟之金埒。堂開七葉。誥錫五花。猗歟盛哉。致足述也。翁南金東箭。毓秀於藍園。蓬矢桑弧。發蹤於菲島。題橋志奮。正當司馬之少年。投筆才豪。已具食牛之壯概。綜車船而握算。負百得千。讀貨殖以知書。貪二廉五。徵特袖長善舞。溢重載於婆蘭。抑且著借前籌。戈豐賞而倍蕘。然後知種瓜種豆。何憚於胼胝。資皮資絺。豈爭

夫咕嗶。昔之臨川之庫。黃榜紫標。眞定之家。寶厨
金穴。以例此之。夫何間然。向使腐氣沾巾。膩顏披
袷。戰風檐而毳毳。葬雪案以晤晤。師孰五經。儒終
一孔。煮黃庚之字。曷以療饑。賣段湛之文。安能作
活。想立錐而無地。問破壁其何時。則營利伯龍。鬼將
騰笑。行歌翁子。妻亦厭聞矣。幸而翁舶泛崑崙。膏
塗蠅蝟。灌繒未鬻。雀硯先焚。以故祇樹園中。地皆
金布。華封頂上。山是錢來。控蚨翼以高騫。尙友揖五


洲之傑。策蹇蹠而健步。素封晚千戶之侯。視彼故
紙鑽蠅殘編守蠹者。其可同日語耶。是非所謂變而
能通者歟。僉曰然。且夫轉枯爲苑者。天心之剝復
也。由嗇而豐者。人事之初終也。翁以儉訓家。以勤
持已。園居可樂。一枝安庾信之巢。市隱自甘。二韭
笑李崇之饌。漬熬雖備。而請臙膏捐。毳罽雖豐。而
烏鱗是服。知貴土賤玉。龍門傳以本富爲先。抑金
穰木饑。鴟夷子之治生足法也。然猶鎮心焯掌。謹

鑰慎樞。司權者孔桑。遷史極秋毫之析。濫觴者筦晏。吳市有春申之遺。用能詒厥遠謀。億而屢中。敦牟肆長。弁冕賓萌。蓋以數十年中。破浪乘風。披星戴月者。翁之力於是瘁矣。翁之業卽於是宏矣。寶井旣填。福田斯植。澤中鴻雁。待平仲以舉炊。轍底鮒魚。拜嘉賓而受賑。贖命採荒之產。創自善明。集義收族之莊。條於公輔。蒙其貺者曰衣我食我。被其光者曰風人雨人。蔡約是禮度之門。范晏有陰

德之傳。木多交讓。火亦同功。立鄉校則械樸歌焉。
固宗祊則葛藟庇焉。睦親隣則芥蒂消焉。竺故舊
則梓桑敬焉。蓋富而好禮。斯和以致祥。揚帆歸陸
質之裝。鳴鼓會張寬之食。三黨躋之。六媼誦之。是
非所謂積而能散者歟。僉曰然。德配黃淑人。梁孟
青山。劉樊白首。燕居自課。藁砧無內顧之憂。雌節
能拘。蠶白有受辛之義。任卹周乎三物。稱善徧於
一鄉。世以敬美爲主饋勞臣。桓君亦持門健者。淑

人其庶幾乎。喆嗣維垣。昆玉鯉庭。侍膝豸服章身。
張家慶之圖。伯歌季舞。行鄉飲之典。公悅媪驩。又
况桐挺孫枝。瓜綿世祚。點頷不妨按簿。慰情無若
含飴。信蔗境其多甘。數箕疇而畢備。九五福曰壽。
此日同稱北海之觴。八十杖於朝。他年再晉南山之
頌。

溫陵施吉浩撰文



顧軒陳先生暨德配黃淑人七秩雙壽

夫人幸生太平之世。閭閻不知兵革。畎畝咸樂耕耘。上無碩鼠之貪殘。下無封狼之擾害。是故幼者歌衢而頌德。老者扶杖以觀風。貧者得遂其謀生。富者亦安於積產。熙熙皞皞。如遊化宇。如登春臺。詩曰。稱彼兕觥。萬壽無疆。民祝君也。爲此春酒。以介眉壽。民自祝也。皆太平景象也。今則滄海桑田。大非昔比矣。改革以來。至于再。至于三。重以南北分爭。

內亂連延。外債稠疊。國事已不堪問。至於民家。則受敲剝。遭蹂躪。流離轉徙。輕去其鄉者。不可勝計。若吾邑僑洋富人。自去年來。多盡室偕行。或隻身長往。鮮有敢留者。有之。則惟我姻世伯陳翁顧軒乎。翁營業菲律賓。以勤儉致素封。性好樸。生平皆布衣徒步。又好文。多識書策。言間動輒徵引。屬辭亦能達意。不等沒字碑。在商界中尤爲難得。余先交。令嗣台拔。後識翁。爲舉拜紀。繼又有秦晉之

聯時於親串往來。聆其言論風采。心嚮往之。憶歲
庚戌。翁六秩稱觴。台拔肄業省垣。余適供職省議
會。過從之際。因以壽序屬余。迄今十易寒暑。翁年
登七秩。令嗣輩將於端月慶壽。仍屬余作序。余
不敢以譎陋辭。又不敢以浮華進。欲就十年中別求
嘉懿。補前序所未言。爲壽徵之揚厲。則值此時局。
翁幾有文明柔順。蒙難艱貞之梗概。其事固卓卓可
傳也。今夫松柏之茂。至歲寒而後知。圭璧之光。經

磨礮而益顯。人苟安常處順。亦碌碌無奇耳。獨至
震撼危疑。風聲鶴唳。而三軍不畏。一木能支。苟非
識力過人。曷克臻此。當變之生也。伏莽興戎。揭竿
起事。篝火狐鳴之輩。嘯聚橫行。大都志在金玉錦
繡。官園素稱腴壤。捐需索餉。紛至沓來。翁虛與
委蛇。隨宜應付。營伍止宿。飲之食之。渠卒皆盡歡
而去。故雖有糜費。究無損傷。漂搖風雨中。而全家
晏然完聚。復提倡鄉團。維持財政。自成一隊。以攘

外安內。而桑梓亦固於金湯。是翁以老境。擅富名。處亂世。而能保一身。保一家。且保一鄉。視彼倉黃出走。逃避自全者。勇怯相懸。奚啻霄壤。宜乎蒙難艱貞。溢爲康強逢吉。而延年之券在斯。卽紀實之詞在斯。豈非昭然衆著也哉。若夫良田美宅之夥。頤。尺素朱提之旁午。信義廉明之足尙。端方儼恪之可欽。作客不遊狹邪。濟人不吝施與。篤本枝則敬宗收族。培後進則桂馥蘭馨。凡爲前序所已詳。

皆爲今文所不贅。茲者鴻鈞新轉。鶴算古稀。酒晉
恆春。詩歌永錫。封翁與德配。椿萱並茂。弧悅雙
輝。繡豸夙荷。恩榮。斑衣齊承色笑。賓客獻南山
之頌。兒孫開北海之樽。樂只君子。令德壽愷。殆恍
惚太平盛事乎。余尤願翁躋無量壽。後日杖朝稱
慶。仍爲拈毫作序。旣備成三之禮。更陪滿百之觴。
亦壽筵中一段佳話也。

姻世愚姪葉福鈞拜撰

德望吾宗故少儔。官園偕隱足風流。庭階種就三珠樹。湖海歸存百尺樓。佳節剛逢燈市過。此鄉共喜硯田收。家居况有萊妻樂。回想南溟歲月遒。

顧軒先生暨德配黃淑人七秩雙壽

宗愚弟陳培錕拜祝

歸來菲島十星霜。小隱相莊學孟梁。企業君能追少伯。承家人競重元方。遙知介兕雙稀古。更倚征

駢獨引惶。

（時子奉命入京
就職將軍府）

九日山頭千日酒。好春佳景

駐榆鄉。

顧軒陳先生暨德配黃淑人七秩雙壽

詩以賀之

黃培松拜題

穎川江夏屬前緣。階老同賡燕喜篇。百歲已扶鄉
國杖。卅年再覩峴弧懸。登堂舞綵來三俊。過海稱
觴渡八仙。寄語鄰家賢令尹。爲吾一撫武城絃。

顧軒先生七秩雙壽